

道生各信，由湘潭专足送至。晚诣刘岷庄、彭雪芹谈。

十七日。朱宇恬、李健斋过谈。娄峻山、张东墅、盛锡吾并枉过。晚过朱香荪谈。意城自岳州回，述及姜昆山贵州人，曾任溆浦，最有声。中丞于此举动过轻，非求治之道。然但幸得一好官，一邑人民受惠多矣。边省人心质实，较之他省为佳，未知究竟何如也。

十八日。由森昌轮船局寄合淝伯相及叶顾之、唐景星、黄泳清四信。又寄饶葆丞、盛展奇二信。黄泳清亦递到曾劼刚、张听帆二信。又接瞿景伊二信。论伊犁事宜六条，具草已久，不欲上言也，至是闻张香涛一折足以为乱天下，为一发明其义，合淝所心知而不敢出一语，稍求以身任天下之诟讥，使合淝得有所借手以行其志，区区愚忱，如是而已。以是稿录示合淝，俾代酌之。刘岷庄见示赠公云樵先生行述，及其从兄习潜公行述，并赠公墓铭、墓表。墓铭刘瞻岩前辈所撰，墓表则左季高相国文也。又刻其赠公《金城书屋诗存》五首，有曾文正寿其七十生日诗一首，皆岷庄所以导扬其先人之业者也。晚邀裴樾岑、陈右铭、黄豪伯、盛锡吾、张力臣及意城小酌，以盛锡吾馈肴饌甚丰，相约一叙。朱香荪以夜不能睡，辞不赴。姜昆山来，见气象远胜於桐轩、潘小农诸公，为之心喜。是日郁热如盛夏。

十九日。雨。与黄恕皆前辈、李次青、（李）〔朱〕宇田、李仲云、张力臣、陈舫仙、邓弥之及意城邀饌彭雪芹、刘岷庄二公于曾文正祠之浩园。雪芹画石作梅刻之文正祠，而题绝句其上：丞相祠堂春作堆，年年风雪报花开。一株老树坚如铁，历尽千霜万雪来。李仲云见示张香涛二折，其一言十不可许，而力持改议之计，云有四要，一曰计决，二曰气盛，三曰理长，四曰谋定：立斩崇厚则计决，明示中外则气盛，暂缓伊犁则理长，急修武备